


~ 16
2941
24





門 16
2941
24

廣東文獻四集卷之廿一分目

何盈州菊芳園集

小傳

詩序

文目

馮達公傳

營壘說

從軍詩序

錦旋詩序

公餞詩跋



廣東文獻四集

卷之廿一

分目

一
從軍詩序

湘大書
31.4.19
藏書

詩目

雜詩四首 五古

壬子秋闈 以下七古

江口阻風

輓黃節婦

鏡 以下五律

哭陳孺卓

丁孝子祠

北科

題光祿傳

新死二首

送惠文宗 以下七律

謁子長墓 二首

會羅履先

五十

懷陳聖取

車陂曲 五絕

輓楊節婦 以下七絕

珠江竹枝詞 六首

咏蜺

讀歷朝詩三首

廣東文獻四集

順德羅學鵬雲山甫編輯

卷之廿一

男培植槐清清滙滙綸綸孫朝琳琳校

何監州菊芳園集

潘士昌鳳山訂

小傳

從粵臺徵雅錄鈔出

何夢瑤字報之號西池南海縣人由拔貢舉雍正鄉試
庚戌成進士分發廣西歷署義寧陽朔補岑溪思恩縣
令三充廣西文闈同考試官與修廣西通志仕至遼陽
州牧引疾歸屢掌粵秀端溪越華三書院教著有菊芳
園集

羅石湖序曰康熙辛丑惠天牧督以粵中予與何報

之蘇瑞一陳聖取諸子同補諸生定交於惠公官署未幾報之令廣西不相見者二十年矣乾隆庚午自遼陽棄官歸相晤於羊城旅次出菊芳園集相示品格出自渭南此詣未易幾也報之家西樵俗多爲吏報之嘗給事大府不合舍去乃攻舉業獲雋憶二十年前予與報之十餘輩結南香詩社一時聲氣豪上稱極盛今復相聚細數舊遊惠公墓木已拱陳聖取死於越勞孝輿卒於黔餘潦倒青衫黃槁牖下者幾半惟余與瑞一報之髮白齒豁頽然三老共話前塵恍然如夢出殘編而商榷今昔之感何如也乾隆壬

申端陽口序

菊芳園集文選

馮達公傳

達公名相天資英爽視世之求富貴利達者猶鬼蜮也少時卽矯然異流俗而有志於學初爲俗師所誤誦制義千餘篇無所得又讀古文辭千餘篇亦無所得於是反而求之經傳尤肆力於程朱之說得李岱雲朱子異同辨頗惑焉最後得胡大靈講義乃翻然大悟知斯道之有真傳也朝夕討論將由此以求聖賢之道雖未有所得而其趨固已正矣素有肺疾遇夏卽咯血今年尤

甚或勸之醫則曰疾不可爲矣方知向學而每以病廢豈非命與因嘆曰士不聞道生爲廢人死亦何恨遂卒年三十有二嗚呼達公可謂有志之士矣自正學不明士之號爲讀書者大都剽竊聖賢緒言以求富貴利達耳烏有真知定力務求實學者哉而其人方揚揚然焜耀於世世之人且艷稱之達公獨能不惑於流俗矯然目異可謂志士使少假以年所造固未可量乃天奪之速竟不克底於成可勝痛哉達公旣矯異於流俗而一二勢利之徒爲鬼蜮者又厭惡達公謠誣不遺餘力而達公不以介懷也嗚呼江河日下惡直醜正實繁有徒幸而達公不死有所樹立得以闕其口而奪之氣今不幸而死有不極肆詆誣哉後生小子信道不篤反以達公爲戒嗚呼達公之死豈獨達公之不幸哉

營葬說

形家擇葬之說儒者弗道予解之曰卜其宅兆吾儒慎終之道也形家飾說惑人耳但辨其非以信吾是可已周禮家人聚族而葬當信也形家謂千里來龍不過一穴不當信也程子五患當謹當信也形家星宿方位不當信也記曰葬於北方北首當信也形家紛紛立向不當信也貧不能備禮懸棺而窆當信也形家破家培補

不當信也遠不能歸葬卽葬於其地如延陵季子葬其子於贏博當信也形家教人焚骨歸葬不當信也天子七月諸侯五月大夫三月是葬不擇月春秋書己丑葬帶不克葬庚寅乃葬是葬不擇日子產之葬簡公毀司墓之室則朝而墉子產弗忍毀乃日中而墉是葬不擇時當信也形家拘忌時日不當信也總之吾儒之葬其親唯欲化者之安故擇土厚水深而無五患之地而止無所爲而爲之義也形家之葬其親欲以利子孫是以親之遺蛻爲後人博富貴之具故破產營之過期俟之致有暴露喪失而不獲歸土者有所爲而爲之惑也

僕恐世人不察故詳其說而告之焉

從軍詩鈔序

說禮敦詩卻穀膺中軍之選投壺歌雅祭遵建征虜之勳代有名賢出爲長子陶征西文書裁答筆翰如流周衛率宴席叅陪篇章立就莫不韻諧病競陋灌絳之無文識洞古今笑蒙欽之失學若夫王新建曠世儒宗視師斷藤峽裏茅歸安大家文士譚兵鬼子巖中尤爲近代芳踪粵西令範以今方昔抑又何殊惟我偉齋宋公白馬王賓黃扉公姓年方踰乎弱冠任已處乎治中栖鳳臺邊凝清香於燕寢繫龍洲畔馳令譽於緹油毀彭

鏡初之淫祠令行草偃酌元次山之冰井清畏人知無
何變起桑江苗民逆命兵分蓉嶺天旅徂征公乃轉餉
層巒監軍中路威風所振屋瓦皆飛旂鼓之臨河流自
却礮扶羊於戲下譬孤豚之償肥牛戮銀豹於行間若
織縞之當強弩故雖羽書絡繹匪紹匪遊乃鈴閣清閒
以整以暇爰磨盾以濡墨遂倚馬以摛詞王龍標賦就
從軍黃沙穿甲杜工部歌成出塞落日照旗撫時則六
月飭戎感僕夫之况瘁志地則新田采芑喜蠻荆之來
威站站飛鳶毒霧埋一軍刁斗磬磬鴻雁冷烟沈萬頃
桑牀弔毅魄於國殤哀生兕練擬征人之鄉思泣上龍

堆夜角風頭淒清答響秋砧月下寒苦傳音凡其傳餐
移檄之時卽屬叉手撚髭之候於是名書峭壁人吟曹
翰之詩跡掃妖氛戶誦高琳之句流傳龍水價重鷄林
某昔宰岑溪已荷細流之納茲移紺嶺重依大樹之陰
瘞鶴祠前共醉醇醪百榼籌邊樓下獨窺芍藥千箱授
此一編命爲後序夫詩律無殊兵律萬事同根筆鋒何
異軍鋒千人共掃故師曠歌風而知勝負周官執律以
辨吉凶白孝德攬轡安閒決致師之必克費文禕圍棋
暇豫識辦賊之無難而况禮義干城詩書甲冑讀車鄰
駟鐵之什足規勇氣無前覽鳥章白旆之文預卜虜功

慶東文獻回集 卷之十一 春明堂選
可奏信文事之兼乎武備知名將之出於書生今昔同
符後先合轍此日比夷吾而吟梁甫按其營壘嘆名士
之風流他年出召虎而人周公釐爾噴圭揚文人之休
命

送楊郡伯錦旋詩序

東都門外人傳供帳之圖南徐道中客誦桂冠之札陶
淵明留情松菊花露溥秋張季鷹雅志葺鱸菱颺浪
碧山不負焚學士之銀魚桂樹叢生悵王孫之春草莫
不相逢道好乞剡木以抽簪自號知非向中條而稅駕
然或情堅誓墓祗緣王述之嫌跡斷懸車爲抱馬良之

耻庭筠雪壓感仕路之摧殘簷網重縈慮仕途之罣礙
曾魯公鳳蹲烏噤有激而行田太守漏盡鐘鳴引年乃
去雖曰急流勇退亦云揣分宜休未有績著奇徵羣看
渡虎政書上考坐待遷鶯忽斥騎以言旋遂明農而引
退鏡湖早覓非關范蠡圖來畫錦榮歸不待崔郎咏就
如我惕翁陳老大人者也公三韓望族四姓名家勲勒
宗彝人在雲臺之上門施行馬烏啼栢府之中虎炳樞
垣偉節咸稱最怒龍驤雲路慈明時譽無雙幼卽清通
長而貴顯妙齡製錦東吳呼公瑾爲卽弱冠栽花南陽
戴翁卿爲父旋以中牟異政洊膺萬戶名州官署肅然

廣東文獻四集
海寧之柘桑交蔭譙門闐若泰和之金矢潛消泊乎五
馬南來一琴西從亭名天繪壁鐫梅摯之文井號金沙
人飲超先之澤於是河中父老爭借寇恂蜀郡黔黎共
遲廉范右江西盡一民九犗之鄉奴嶺橫巉鐘酒雙龍
之俗境鄰鬼國流官以青草爲憂地是苗疆利器遇盤
根而顯酌龍江之水清比昭潭登慈惠之樓嘯同捲雨
愛深冬日行郊忻白鹿隨車明察秋毫遣吏憫飢烏攫
肉嘉謨入告 巽命重申河東爲我股肱仍煩季布汝
南乃朕心腹終遣韓宗再擁朱幡還森畫戟賜車高一
丈竚看假蓋之威報最過三年快覩及瓜而代朱仲卿

少需北海卽拜司農黃次公一去潁川便侯關內而公
歸田作賦慕方澤之龍吟介石知幾羨南山之豹隱四
十年出身奉國自憐閭帥將衰七十歲投劾去官咸惜
孔君尙壯扳轅父老花枝盡裊長紅送客長途草色遠
連晴翠一時傳爲盛事千秋景此高風夢瑤待罪寒坡
庇身廣廈鎔金就範鑄顏空負洪爐運斤成風鄧郢虛
勞大匠操刀欲割點鉄無方曾移疾以乞身擬挂冠而
掃軌詎意官同雞肋去矣仍留組若蠶絲解之還縛觀
冥鴻高舉深慚燕子窺梁瞻天馬超驥益愧駑駘戀棧

珠江公餞詩跋

王子平作牧荊州送行空邑殷仲文還車姑熟供帳傾
朝莫不酒泛紅亭帳灞陵之柳色賦成碧草感長浦之
琴聲况夫仁壽去官涕揮巒嶠曾岐移鎮塹守軍門寧
無浚儀之圖可乏河梁之咏然繪吳山以贈策歸太僕
一記而外絕少篇章卽賦鄭志而餞郊子太叔六卿以
還餘無賡和終覺離筵減色渭唱徒殷未有華館重開
隨斑駘而斷鐙離支代染搜勝蹟以充囊共吟長瀨之
津詩中有畫羣咏沉香之浦字裏尚歌如今日之送公
者也公天上張星丹陽弧宿邑鄰桃李琴高控鯉之鄉
家傍梅谿謝眺題詩之地弱齡博物能通三篋亡書太

學蜚聲爭訝兩京繼賦博陵崔子發時號儒宗廣平宋
游卿入稱國器操刀能割子奇以年少治阿學古人官
信臣以明經補令藕泉亭畔泠泠琴韻流清金屑城中
寂寂簾波漾影拓豐山之舊院士誦菁莪復竹徑之前
陂童謠黃鵠勸墾損黑墳之稅表忠封赤坎之瑩洎乎
周景題輿士元展驥門通十字乘宗慤之長風寺啟三
巴闕耶蘇之邪說交州白幟悉歸綿蕪之區來板紅毛
咸奉泥金之表凡茲善政難罄名言韓思彥加二級而
待詔宏文僉云宜矣薛季昶閱數月而驟登御史豈曰
無然夫何六鷁退飛黃楊厄閭借寇恂於河內疊飛兩

府之章留侯霸於臨淮融侯九閩之命暫閒休沐仍任
賢勞從事雷陽大有駿鸞之錄司鹺潮海競傳驅鱷之
文由其業擅風騷性耽績藻登高作賦江山之助偏多
對酒當歌慷慨之辭不少以故箱盈芍藥抽秘緒於王
充集號椒花采幽芳於屈子而且虛懷下士加意憐才
謁徐穉於南州沙村騎馬訪戴逵於剡水雪夜乘船薄
俸助盧仝感生赤脚遺文收李賀笑舞連眉遂使北府
人才半依蓮幕西園詞客並捧珠槃賈浪仙句待推敲
月下頻來突仗曹景宗韻諧病競夜分還就聽詩誰與
夏國人倫君也汝南月旦與高齋之選便號名流經記

室之評居然上品藏鈎賭酒孟公之轄紛投刻燭分題
蕭氏之銅逸響方慶冠裳之會飛蓋頻追詎知慈惠之
師板轅莫挽珠江月朗輕飄一葉之舟梅嶺花殘遙上
大槐之坂是以江淹賦別望南浦以銷魂徐晦歌驪步
藍田而雪涕亭張卧雪寫來一片冰心詩咏飛鴻咽入
數聲風笛彙成方冊用實行裝將召伯之憇甘棠披圖
如見亦廉頗之思趙卒展卷難忘此誠桐鄉繫戀之餘
風穗石去思之盛軌也瑤本陳人受知國士自忘其寢
江神幸見秦王誰恤予貧管子欣逢鮑叔買田陽羨時
多肝膈之言延譽荊州長藉齒牙之論臥嬰兒於轆轤

井上難禁失乳之啼別中郎於笛椽亭邊更抱知音之
感駐馬請終三疊勸君更進一杯試看合浦之珠散而
復聚莫忘包山之錦去矣還來郭伋重迎應訝兒童皆
長嚴公再鎮定知花柳相尋

芻芳園集詩選

雜詩

日徑五地周仰觀如銅槃日中若有人視地如彈丸此
丸偶中處豈得尊配天坤母子離日吾意不謂然兩大
已強合三才孰與聯愚哉橫目民誕妄乃自賢豈知人
與物細若塵遊暄紛擾將奚爲相吹一息間靈椿笑老
彭夭折何無年

地不得配天故社行於郊有合祀而無分祀郊社之
禮所以事上帝不言后土不是省文先生特識可破
千古之謬

地形如懸毬天樞如轉軸循環無端倪團團相攢簇氣
周物亦徧附地億萬族上下無定名衆輻輳一轂各自
上其首各自下其足此疑彼倒懸彼謂此橫屬何處爲
四夷何處爲中國偶爾有梁魏妄自爭蠻觸伯翳著山
經地下人不讀

其三

羣山天所降豈曰從地出地心一拳土豈能四外溢二
氣未分時清濁混爲一風輪日外轉渣滓乃中結所降
非一時所結非一物難據今日形尋彼當年脉陋哉堪

輿家青囊師郭璞

其四

孩提愛乳母甚於愛其親乳母旣所習乳復懷其恩始
信食與色兩者性所存禮義乃後起防淫聊飾觀

示長兒

死生旣有命富貴亦在天聞此固已早胡爲徒愁煎學
道無所成乃爲兒女牽拭泪讀莊易如解徽墨纏草根
芟復生死灰滅再燃聊爾進一觴盡解憂百端

哭族兄雁朝

古人重不朽所貴德與功空言亦何補垂訓能不窮苟

但事繪藻小技何足崇同學十餘年所得仍雕虫沾沾
輒自喜毋乃心猶童方將易故轍古道希高踪哀君竟
無成抱此區區終

立德立功非立言亦難不朽但辨其有物無物耳若
但以雕虫自喜真空言無補也易故轍而天不永其
年亦若限之矣是以君子擇術貴早也

和詠菴

天地逆旅耳何去復何住四海若比鄰千秋等旦暮出
門有仝人傾蓋即如故眷此何為者壹鬱誰與語結交
滿天下知己不一遇握手出胆肝轉盼委道路

千子秋闈和范太史

粵西棘院獨雄峙相傳舊是藩王邸

明靖江王府

仙李盤根

白玉堂倚蘭秀茁黃金妃千年磐石奠苞桑一夜煤山

泣澥棠狎客不聞來結綺詞人空自賦靈光

興朝賜

與元勳第

謂定南王孔有德

娘子軍裝來小隊

謂定南王女孔嗣貞

山君

夢斷月牙寒

月牙池在粵秀山麓定南王夢有虎

海燕

春歸玳梁廢威權富貴難久長王府翻為校士場玉燼

仙仗朱衣引晶瑩水鏡懸高堂慚予叨侍鸞儀帳昔年

辛苦何曾忘院後一峯名獨秀登臨憶在深秋後古今

俯仰總成塵惟有青山尚如舊今來不覺又經年依稀

葵麥晚風前却笑求珠賚象罔摩挲老眼戰場邊

儀貞江口阻風

君不見阿童長江燒鉄索樓船風利不得泊又不見登
高作賦王子安飛帆直上滕王閣破浪乘風豈偶然文
章小技亦關天老我無用天不急豈復有意相後先順
逆通塞隨所遇怨尤踈妄久已蠲寧無一息千里日快
意何必定目前雖苦留滯頗有得飽看南岸山色鮮打
頭白浪枝止矣浮冰何來銛且堅

黃節婦輓詩

吾聞娶婦已有日女死壻往弔其室壻死女弔亦如之

此禮於今已廢矢况乃矢死終不嫁求諸未字萬無一
千古獨有孤竹子畢節首陽乃商逸危素爾枉稱老臣
嚴顏亦作降將軍操持不定已如此綱常扶植乃嬖人
洗家有女顏如花江夏黃童聘爲家未幾夫壻先朝露
素車奔喪衣披麻立孤難兮死易耳夫無妻兮焉得子
夫有妻子妾有夫妾責已完妾可死節婦忠臣有同情
肯令巾幗獨垂名補鍋賣麪俱未仕至今難死猶如生

鏡

一往深如許沿洄意象同水潭終有底月明不會空此
地是何處如伊宛在中可能容我住移宅廣寒宮

哭陳孺卓

山阿啣落日山鬼哭啾啾有地理狂士無鄉覓醉侯生
纔數十載死即萬千秋念此真無奈蹉跎歲月流

丁孝子祠

孝子名密岑溪人見廣輿記有碑今仆遂訛為丁蘭
孝子丁公密蒼梧漢郡人姓名垂志乘踪跡失瑱珉荒
沼菰蒲綠空山蚨蝶春猶餘祠廟在長拜下風塵

孝子廬有鳧集其旁池墓在蚨蝶山 自注

北种

在岑溪明設鎮於此今廢惟狼兵尚存

殘壘星碁布當年部曲分空餘弓箭社不見鸛鵲軍
甲雖無事呼庚已漸聞更番猶遠戍山郭夜眠雲

國初調狼兵二十五名守城 自注

州掾關君出其曾祖光祿公傳見示索題

崇正十五載闖賊犯陳睢三月陳州陷先生寔死之乾
坤留碧血風雨降靈旂張許今重邁千秋有並祠

祈死示兒輩

人生駒過隙蜉蝣寧久存寸絲都不掛百口又奚論鄉
里名妻妾蒼黔視子孫身猶非我有於汝復何恩

其二

貧窶安天命吾今亦已哉埋憂空有地避債却無臺自
怨生同贅何妨死作灰華顛錢醉酒休為信陵哀

送惠天牧師還朝

七尺珊瑚出水寒月明鐵網海天寬琢成美玉皆如意
擲去明珠亦莫難千古才人齊吐氣一時名士盡彈冠
自憐冀北空羣後也辱孫陽着眼看

才人吐氣名士彈冠真是一時盛事與八百孤寒齊
下泪一時迴首望匡州同一憐才好士

謁李子長先生墓

石磴雲深鳥喚春孤墳寒食昏灰新九京容我尋高士

三疾如公是古民死有名山堪葬骨生無奇服不驚人
當時誰信流風遠歲歲蘋蘩采澗濱

其三

人生不朽最難言好附青雲逐驥奔處士壟成王失貴
先生墳在社常存江門久矣垂千古雲路今來是 村
更有豐碑文字好村翁時為拭苔痕

羅履先郵詩招隱次韻奉畬

石湖秋色淨無烟何日隨君上釣船十載相思愁似日
一官將老酒為年空拋陶句教蘇和肯把嚴詩雜杜編
便乞南園修舊社歸耕猶有硯如田

五十

不信今朝剛五十依然四十九頭顱詩慚鼻祖稱才子
醫笑頭銜署大夫老矣無能爲也已時哉其可失之乎
廿年文酒無多日盍早休官擬白蘇

寄懷陳聖取

兩載松窗掩白雲秋風猶憶共論文雙門支屐君尋我
夜半籠燈我訪君錄就元龜須轉借續成御覽幸相聞
著書自是名山業誓墓何妨學右軍

車陂曲爲汪烈婦

烈婦西寧汪起瀾妻起瀾溺死烈婦誓以身殉自經

掾免俟夫立後託言祭天津所行至車陂投崖碎首

死年僅二十二有司上其事入祀節烈祠

祭郎過車陂車輪妾心似萬轉與千迴欲死不得死

其二

欲死不得死奮身投車陂多許防守人誰能牽妾衣

楊節婦輓詩 天河人

容江龍水不同源除却雲凌別有村若使玉環今未死

定應慚負壽王恩 容縣雲凌里
楊貴妃故居

玉環無處置喙寫一面而兩面俱到是爲雙管齊下

珠江竹枝詞

儂是珠江水上生今年水比往年清海珠寺右魚珠左
無數人來看月明

其二

看月人誰得月多灣船齊唱浪花歌花田一片光如雪
照見賣花人過河

其三

賣花聲最斷人腸花落花開總自傷莫向百花墳上過
阿喬命薄似真孃

其四

不死人間是素馨春風歲歲喚來生昌華不少如花女
埋沒誰人喚姓名

其五

昌華苑接荔枝洲影入珠江不肯流試上五層樓上望
珊瑚千樹水西頭

其六

春日高樓大道傍穿花盤縷試新粧珠江舊是風流地
肯把班駘送陸郎

此惠文宗試士題也先生以此詩壓卷因遂知名

詠蜆

塊肉雖沉宋未亡獻芹猶識舊江鄉誰知帝系關微物

賴此人傳趙旦王

趙王且舟次韋冲乏食有進蜺者王甘之謂無柱當更佳此地之規遂無柱云

讀歷朝詩

香山率直無餘味吏部奇橫非正聲獨有青蓮擅千古未應子美得齊名

其二

海涵地負東坡老玉質金相陸放翁前輩風流誰繼得虞山應是後來雄

其三

觀於海者難為水若問源頭天上來識得江門為正派始知金鼎是奇才

廣東文獻四集卷之廿二分目

馮縉雲大埜集

小傳

附論

文目

壽文

張躍珍傳

懷古詩序

詩目

鼎湖瀑

以下五古

中宿旅館

題翟東生小影 七古

石上題詩 以下五律

踟躕吟

寄陳素秋

謁韓文公廟 以下七律

謁岳武穆墳

附詩

九日蒲澗

岳陽樓

黃鶴樓

附詩

白牡丹

菊蕾

索畫

招飲吳山

送張明府

送魏明府 排律

廣東文獻四集

卷之廿二

馮縉雲大埜集

小傳

從粵臺徵雅錄鈔

馮慈字子持南海人始由西樵之簡村卜宅羊城乾隆甲子舉於鄉辛未成進士歷任浙江縉雲歸安龍游各縣尹著有**大埜詩文集**

按先生不以詩鳴又不與騷人爭長壇坫故當時聲稱寂寂且其詩刻附於制義文稿之末篇幅寥寥體裁褊小卽後世亦鮮有知其能詩者然細按其密咏

恬吟簡練老到寄托遙深專門名家莫能相尚因嘆
抱璞空山者未嘗無人但相賞於風塵之外者未易
云覲耳

大埜集文選

壽文 代潛齋作

由廣郡而東三百餘里峯列四百形壓二州雲霞蒸蔚
氣象萬千者羅浮山也未至山數里溪橋交加原埜鮮
媚雞犬熙而園圃叠者環山之村落也望中小山巖然
樹木葱蒨不必羅浮而自成壘壑者羅浮之梁甫也依
其下而營堂室長子孫者為依岡村則皆吾宗人也始
居者誰希孔公也公從宋季隱築是間數傳乃稍出而
仕中間舉於鄉顯於朝家世詩書傳青紫者雲孫賢裔
輝映後先也當吾世而有文行冠一時福履邁前修望

而知爲神仙中人者肖峯廣文振鐸連陽者也藹然春風皎如秋月者先生之品也鎔經鑄史發爲光華者先生之文也有本有末亦質亦文者先生教澤在連州之人也八千歲爲春八千歲爲秋始基其一者先生之年也野雪飛而塵伏江梅放而波明者先生懸弧令辰也登堂賦詩開樽稱兕愛先生者祝先生也朱幡皂蓋連之牧也雅歌投壺連之帥也章甫縫掖連之士也斑衣戲舞諸公子也問安點頷諸孫曾也耳目聰明神閒氣靜者先生顧之而樂也先生家近羅浮無八而不自得者學道功深也撰祝嘏之詞以紀其盛者宗人成修也

張躍珍傳

張躍珍者東興里之初祖也里當增從龍門三縣咽喉兵興以來山寇出沒無常躍珍設法防捍得免蹂躪人推爲保障劉總兵勦賊其地俘男女數百珍惻然請於劉曰比年兵燹頻仍戶口十去八九盍推罪人不辜之義貸諸男女亦爲國家生聚計也劉然之躍珍竭力糾諸鄉里粥之榜通衢使各引去尙藩時諸無賴之隸籍於旗者橫恣莫奈一日暴珍鄉珍時爲諸生輒櫻而折之列其兇狀因謁者以詣王王曰生何爲珍曰君王武定南陲功銘鐘鼎英風所至草木摧折謂宜少煦春陽

以避元元而永帶礪乃臺輿下隸怙勢力以玷王威樵
夫牧豎不知大體向隅之下噴有煩言生愚竊恐爲君
王盛德累也王遽按狀置諸無賴於法是後附省諸縣
得少減藩下之害進士張朝紳者故明兵部尙書家玉
季父也玉兵敗朝紳挈玉子走匿珍家八閱歲卒無恙
康熙甲辰朝紳始出成進士

按廣府志躍珍名兆璋增
城庠生事蹟與此傳同

懷古詩序

枕上十年江南萬里一夜清風明月千秋霸畧王圖洵
才子之多情實感懷之有自爰有西冷趙子翩翩逸士
矯矯名流積不平之氣於古今稟獨用之心於宇宙關

山遊倦捲簾開落幾多花鄉國夢回搔首踟躕無限事
經楚尾吳頭而心碎過離宮路寢以魂消與替滄桑片
言勘破頭狂鶯燕一筆勾除咳唾珠璣作玉衡未見中
郎才曠爐錘鉄石成金鑑幾曾工部詩亡人言佳句自
愁來我綴清詞療俗去

大埜集詩選

鴻湖瀑

浩浩來天表排雲駛風磴飛動萬重山不礙一林靜默
非大化機滯豈達人情與誰窮真源豁然暢幽興
卽子在川上之意

中宿旅館

旅舍得幽亭迥與塵囂避一園足青紫層山獻明媚僮
僕入市還濁醪不我棄微酬望滄浪悠然舞雩意

冲澹

題翟東生小影

嶧陽之桐高百尺幽人幽興深相結調羹不試但品泉
此外一毫不相涉五絃無俗腔高秋宜清商悠然古山
水斯意誰爲旁

石上題詩掃綠苔

山若有人兮臨風而誦詩塵埃不著足木石深相思欲
下踈踈葉凭敲娓娓詞佳人豈違世把臂入林誰

踟躇吟

有血何妨熱無才不敢騷自憐非老病人最厭風波酒
縱裘頰典燈挑首一搔擬將狂阮眼青向貴人曹

將度嶺寄懷陳素秋

嶺雪漫南海懷人獨擁裘似君應有夢而我未忘憂身
事道遙得天倫委曲求凌寒折梅蕊兼寄夜窓幽

五六是學道人語

謁韓文公廟

廟貌巍巍粵海湄斗山瞻仰叩崇墀分明氣奪三軍帥
豈獨文高百世師佛若有靈臣不悔士如失教俗難移
如今歸去潮陽遠韓水韓山萬姓思

闢異端而崇正道是昌黎不是東坡

謁岳武穆墳

巍巍古墓揭豐碑喬木陰森過客悲三字已成秦相口

兩河猶望岳家旂書生科豈機權中亂世天原禍福奇
臣道似公良已足人心終古恨奚爲

如此論古方不捨人牙慧予嘗有咏史詩云福則爲
汾陽禍則爲武穆武穆遭奇窮汾陽享庸福武穆令
人思汾陽願已足孰得而孰失可欲不可欲禍兮福
所倚福兮禍所伏似可與此詩第六詁相發

九日蒲澗

偶爲重陽想翠微杖藜冲破白雲扉瀉來瀑布泉千尺
老却萋蒲草四圍自古盡疲今日屐登高誰振昔人衣
安期去後無消息跨鶴歸來事未非

岳陽樓

洞庭波浪幾浮沉有客登樓酒獨斟湘水幾時流剩恨
君山終古動哀吟若能憂樂先天下便是經綸冠古今
讀罷范公遺記後湖光山色寄遐心

黃鶴樓春望

警咳真堪帝座通憑欄不受市廛風煩襟豁處目無力
古調吹殘花一空自愛白雲浮綠蟻何須黃鶴馭衰翁
晴川鸚鵡塵埃盡惟有江烟萬古全

附拙作崔顥題詩在上頭後人誰敢騁雙眸春來有
景山川繪筆底無端天地收黃鶴自來還自去白雲

隨散復隨流，湏知景物皆空幻。莫使登臨發旅愁。

白牡丹

瑤砌層層擁閨仙，魏姚庭院總虛傳。不辭富貴何曾俗，
比潔冰霜肯受憐。絕色任教塵目賞，至文惟許素心箋。
十分春色羞呈艷，淡蕩風光錦檻前。

菊蕾

一點春心老未舒，繞籬蜂蝶去來無。西風許贈陶彭澤，
南國還遲屈大夫。不盡霜華催木葉，依然秋色借茱萸。
閉門莫訝高人懶，隱逸從來賞識孤。

向徐少仙索畫

入眼溪山一筆收，誰從冠蓋識風流。新詩許奪驪頭領，
秃管兼凌顧虎頭。冷暖尋常同宦海，風塵七十自陽秋。
袖中知有寰瀛軸，借我雲邊幾日遊。

承魏張二少府招飲吳山

符分五馬兩賢良，領客憑高興不常。竟坐樹巔烹石髓，
更從崑罅泛瓊漿。大江雲湧孤峯出，小壑風迴勺水狂。
爛醉正思醒酒物，雜花隨意弄柔香。

送番禺張明府

識韓何幸在番禺，重屈名賢事簿書。牛未試刀雞已割，
袞曾無闕錦先儲。山搖風落僧繇筆，鳧起雲連博望裾。

舊探驪龍入星漢掌中奎璧定如何

送魏明府入覲

化日融南極卽星動北辰鳳凰今翮羽崑谷舊回春初

過絃歌地剛隨竹馬人菁莪濡雨露樛散荷陶甃侯任增城

慈肄業增通邑賢良切移封顧復親改令南海宮墻依色笑

文籍起因循漢殿徵黃霸蠻方借寇怕牛刀頻試割羊

石四扳輪四任南海浹洽成文治從容遠徼塵烏臺推撫字

鸞閣下絲綸俊鶻當秋爽修螯絕海氛河山天子國

紳紱太平臣清問移中漏皇衷注遠民花驄分駮駟

竹節擁麒麟露湛桃村曉烟輕柳岸新東風播韜鐸羔

酒及吹豳

廣東文獻四集卷之廿三分目

黎射洪端州小草

小傳

附論

詩目

獨坐 以下五古

對蓮

端硯歌 七古

包公祠 以下五律

八賢祠

懷金華山

蠹魚

下瞿塘

過石頭

錦石山二首 以下七律

登拱北樓

懷馮愨樵

挽羅石湖

陳白沙集

湛甘泉集

會楊紫川

祝鄧州牧

送陳廣文

會健夫弟

送何章民

會何章民

送李廣文

別潘廣文

梅

擲硯沙

晏起

午睡

東麥明經

送何鴻文

望夫石 以下七絕

虞姬

迎春曲

廣東文獻四集

卷之廿三

黎射洪端州小草

小傳

從粵臺徵雅錄鈔出

黎偉光字以行號樸園順德槎涌人雍正癸卯孝廉歷任揭陽澄海學博升四川射洪縣尹後復改高要學博著有冷香齋集

按先生冷香齋集今已散佚無從蒐討祇於其宗人鶴川上舍處得其端州小草一帙是官高要學博時所著者但斷簡殘編故所收從畧然考家章山文學

所咏歲暮懷人詩於黎樸園明府題云大雅唐風始射洪派流天寶杜陵翁何人復振三巴耳聽取香齋詠蜀中則冷香齋集必有可觀惜乎大雅云亡矣附識於此以俟異日補遺

端州小草詩選

獨坐

塵務日交馳閒窓喜靜坐薰風晚送涼炎威陡然墮濁酒下漢書適意聊自好萬物各有營至道在無我

對蓮

初日麗芙蓉田田何少美映水愛漣漪搖風更斜峭露滴蕊珠擎皎然出塵表

端硯歌

五丁霹靂啟羚羊水接牂牁勢若狂不知何代巨靈擘硯材孕結斧柯岡上爲屋宿下爲石鑿開混沌靈窟劈

廣東文獻四集 卷十三
二 春明堂選
坑別東西各不同惟有老坑奇莫敵乍看霧氣暗朦朧
青花火捺相搖空或爲馬肝與鴉眼雀斑蕉葉眩雙瞳
翡翠黃龍時習見更有紫石光熊熊得石還須善琢磨
方圓體製不同科皮膚去盡肌理出渾然璞玉完楚和
從來硯質首端州千金價值等閒酬妾視金星勝龍尾
澄泥雀瓦不堪侔吁嗟乎維翰磨穿兮志已衰山川毓
秀兮體無虧以方寸爲良田兮人事蓄畬藉管城爲耒
耜兮不懈居諸磨不磷兮沮不緇厚重過於璠璵金爲
相兮玉爲質精瑩陋彼碑磬置席珍以待聘兮又何羨
乎趙璧與隋珠

謁包公祠

昔賢不可作端守數公先一笑黃河潔雙旌赤日懸貪
泉心共矢合浦節逾堅穆穆清風在千秋俎豆虔

謁八賢祠

祠在端州祀唐中書令張公柬之太尉李公紳宋少
師劉公摯侍郎鄒公浩致堂胡公寅忠簡胡公銓少
師留公正少傳越國公張世傑也

血食留千載風猷緬昔時當年同愛國異代宛相師舊
蔭棠遺樹羣情泪紀碑祠臨星嶺畔瞻拜肅芳儀

懷今華山

三

三 初射洪端州小草

三

三 春明堂選

山在四川之射洪縣相傳黃初平牧羊處也邑人唐陳子昂讀書臺及明楊都諫勗祠皆在焉予宰是邑捐俸重葺今雖不復履斯土然不能一日去諸懷也因紀以詩

兩年遊宦地一別渺重關伯玉臺仍在楊公檻可攀心懸潼水畔夢繞玉屏山去後慙何武碑留反厚顏

蠹魚

性蠹原非俗名魚類各分生涯攢故帙枕籍在邱墳好食神仙字時隨蝌蚪羣書城攻破後滿腹是斯文

下瞿塘

灩澦風稱險重過百念併水從天際落舟在石中行兩岸鋒如戟湍流浪似鯨漫言誇利涉忠信也心驚

過石頭謁外舅霍封君墓

少年稱上舍老大作封君念載違顏範淒然對古墳風高松變色苔染石成紋薄宦慚無報山前泣暮雲

錦石山懷古

舌劍雄於百萬師陸生三寸定南隅丹崖冲碧留王氣黃屋歸朝失霸圖石自不磨名錫錦山能效命漢膺符書功不減燕然碣贏得芳聲滿粵都

其二

何事貔貅示國威使臣仗節八蠻歸積年版籍霸秦吏
此日江山入漢畿樹老崑巔懸日月雲移嶺髻彷彿旌
千秋不改青蒼色瞻拜荒祠弔落暉

秋日登拱北樓

樓連鎮海勢凌空棉樹經秋半染紅繡嶺彩雲羊石北
浮天雪浪虎門東城臨珠島通蠻市漏滴銅壺協化工
十郡烟花紛檻外一時憑眺思何窮

懷前高要學博馮愨樵前輩

先生諱鍾南海孝廉工詩慷慨任俠歷高要學博俸
滿例應考驗以目疾辭職翁學使嵩年稔其學行懸

牌免考蓋憐才也予少時曾從問字今得改補高要
步先生後塵景仰前徽因成一律

駿望曾蜚端水上蘇湖遺範至今傳詩工七步方曹植
學足三冬擬茂先南海夜珠光峽水北冀良驥逸幽燕
一瓊幸躡清塵後問字還思舞象年

挽羅石湖

念年牛耳執詞場一夕驂虬返帝鄉杜老壇空吟客寡
黃公鑪在酒徒荒名馳北冀傳三輔派接南園重五羊
回憶石湖分手處不堪涕泪弔沅湘

讀陳白沙先生集

嶺表儒風第一班舞雩陋巷恍曾顏千秋宗主尊閩水
一代同聲有定山好句拈來皆妙諦端倪養出闖儒關
圭峯清籟江門月都八先生杖烏間

讀湛甘泉先生集

哀然道範起南溟師表南雍衆望傾學本白沙資羽翼
道侔新建樹干城中堂三歷遺雙鳥獻納千言重兩京
嶺表儒宗留俎豆菊坡先後竝芳聲

畚楊紫川太史

竒傑由來間氣生關西家學接冰清木天共仰知名久
泉府還欽報政成閣上藜烟燃太乙篋中蔬草雜芳藿
一種幸接濂溪範霽月光風洽性情

祝德慶鄧州牧

文章治行冠儒林間世名賢應作霖保障已成三異政
飲水時凜四知心喜逢嶽降雙星燦况復喬遷五馬臨
欲擬借恂留不得錦波亭外滿棠陰

送德慶陳廣文入覲

驪歌握別古端濱夙好難忘是德隣百里符分欣捧檄
九重恩賚起潛鱗李桃化普春風舊民社心勞雨露新
十載寒氊曾閱歷琴堂知亦樂清貧 頌不忘規

畚健夫弟

匏繫崧臺類懶殘齋頭苜蓿長欄杆花封舊亦希良牧
皇席今來復冷官白髮尙仍甘芹瘦破裘終是怯霜寒
情深棣萼勞相憶麗句書鴻見胆肝

送何章民孝廉謁選

鴻才眈隱懶之官捧檄人今始識韓五葉家聲傳太傅
六朝文藻重葩壇花邊醉月南塘舊馬首餐風北地寒
此去定知宏雨露花栽滿縣未饒潘

富何章民

風塵久歷合投閒老大休官百務刪兩載蜀琴慚北地
念年皇席負東山雄才落落推君獨白髮蕭蕭愧我孱

舊好攬溪時入夢沂泗還擬叩元關

送李廣文調萬州

端江化雨始經年捷足如君孰比肩苜蓿共嘗欣接席
文旌忽指向南天輕帆渡海三更月絳帳風開五指烟
筆架芳規今正邇步趨端不愧前賢

海忠介號筆架
致官自注

贈別潘廣文振鐸循州

同袍喜得逐清塵幾度端州接席茵氣味芝蘭常賦我
文章珠玉每驚人昔年綏水春風洽此日鷺城化雨新
清署舊爲趨侍地豐湖會寄浪吟身

先進士鐸惠二十
載予嘗省侍自注

梅

豈是飛瓊化後身玉環仙珮見精神朱門羞入時防玷
白屋甘栖忍受貧十載窮交詩作侶半生投契菊爲隣
芙蓉四百容高卧忙殺襄陽策蹇頻

過擲硯洲有懷包孝肅

水接牂牁兩峽冲包公遺蹟在洲中硯拋已著千秋節
舟過猶堪百世風片玉任教誇至寶寸心惟恐愧清通
隱之香清鬱林石循吏孤標百粵同

晏起

不覺墻來日已紅起憑花檻自冲融無窮世事同蕉鹿
到處游踪一雪鴻酒可降愁成獨醉詩惟適性漫求工

徜徉却愛天隨子穩卧江間任雨風

午睡

近向希夷得睡方午窗欹枕納新涼疎疎雨滴簷前漏
習習風搖檻外簧日電乍封雲欲暝鼻雷打破日初長
何須別赴高唐夢瞬息存神內養方

柬麥明經

京華旅食九霜餘飽歷風塵又返車虎觀已登名尚隱
龍門欲上願仍虛書探東壁雙眸迥詩敵西崑八病除
三寸舌留還有用莫因裘傲漫歛歔

送何鴻文廷試

廣東文獻四集

卷之二十三

黎射洪端州小草

八

承軍堂

文藻翩翩映鳳毛
白眉風格別諸曹
鷄窗自昔才華裕
虎觀於今譽望高人度
梅關雲有路
詩題燕市鶴鳴臯
尚書給札邀恩邇
盼爾青袍換錦袍

望夫石

獨處崗頭不計霜
落花爲被石爲牀
妾身若化巫陽女
朝暮猶能近楚王

怨而不怒

虞姬

楚歌四合已難支
垓下歔歔苦別離
一死却能先報主
八千子弟遜蛾眉

迎春曲呈高要明府

青旗載道迂農神
草綠東郊雨露新
到處迎春春有脚
春膏爭擁使君輪

廣東文獻四集卷之廿四分目

胡孝廉賜書樓詩

自序

附論

詩目

座右銘

四言

詠古

以下五言

風蘭

寄談用修

壽梁采山

馬食禾 以下樂府

蹈車曲

周茂婦

篋篋引

草書行 以下七古

屠牛行

畫龍歌

送曾生入京 以下五律

初晴

送謝少文

飛雲頂

俠客

太白樓

浴日亭

孫典籍

陳思王

不寐

對奕 以下七律

班婕妤

硯 以下七截

聞任郎歌

呈謝又文

呈謝參

竹枝詞二首

卷之廿四

朝孝廉賜書樓詩

自序

亦常生二十五年矣承先太史教治經術課程暇竊學
 為詩事物所值悲愉所存不知識卑而辭陋也邇來頗
 惜藁失不復記憶無以為異日學問進否目鏡之地故
 稍拾而鐫存之夫當世賢士大夫暨諸同好時出其餘
 事為風雅者遠近林立孔子云就有道而正焉其將教
 誨我矣詩始乾隆庚辰至今丁亥八載存若干首

胡君亦常字同謙順德豕浦人自少能詩工書年逾弱冠卽手繕吟稿付梓二妙兼擅故爲名流推重迨辛卯薦賢書壬辰落第南遊癸巳旋卽下世倘少緩歲月則人琴俱亡矣是以君子貴早服也
馮魚山謂粵詩曲江後推海雲繼海雪者惟豕浦愚謂曲江五言古體高古肅穆變六朝綺靡之習開三唐正始之聲微論粵人卽李杜亦難比肩如以粵論則曲江後斷推白沙繼白沙惟有海目若海雪詩胎源騷選與曲江不類豕浦五言近體神似海雪此則爲知言之論也

賜書樓詩選

座右銘

前有古人後有來者寶厥榮名千載而下
言簡意該目空一切按座右銘各隨其人之病而鍼砭之自漢以來名作如林而吾粵則崖清獻公尙矣
霍文敏公次之作者亦自命不凡使天假之年當不爲不檢之名士也

詠古

淮陰爲連敖汾陽在行伍一朝陷網羅英雄氣誰吐滕公躍批鱗王孫振頰羽俄頃括機關安危繫萬寓默然

廣東文獻四集 卷之十四 三 春田堂選
天地心名士爲之主舉芳穢藪區搜珠濁水浦賞識隨
恒流豈足垂千古

言資格用人不能使英雄入彀也讀此爲之慨然

風蘭

王香秀幽谷衆草原難同茲種更靈異生氣迎寒風孤
根露烏瓜碧數春朝蔥撮土絕附麗翳笠懸玲瓏本地
盡親下恠此凌虛空生非天地私豈不隨飛蓬蕙蕪擢
莖紫攢簇紛葩紅物理悉可測造化寧爲工芝亦生無
根誰任滋培功

芝艸無根醴泉無源豪傑之士雖無文王猶興其依

傍門戶者必非佳士此張師德兩及吾門而爲王文
正之所輕也

寄談用修

濯濯江上柳落落礪底松物情互欣悅乃知春與冬人
生不困阨安知英與雄造物有厚薄料匪恒情同衆庶
映其生君子固其窮高空見天骨懷子臨長風

談公槃澗中之坎坷者讀此贈言慰籍良至然公擅
詩古文詞著有竦園稿亦足副良反之望今予編輯
是集力求之而未能得附識於此以俟異日補遺

壽梁采山先生

常祖翁同師常師翁猶子常行諸孫同常得撰杖几翁
德厚作人後進所心喜言行程先民著述淡且旨聞昔
宰海鹽下車譽斯士獎勵成羣儒屢屈今人指當時風
俗移循良差可擬退乃化其鄉達尊德與齒重來歌鹿
鳴驚喜溢閭里所祝難老詩永錫今其始

梁公令海鹽有異政享大年膺厚祉著有取斯堂稿
予亦求之未獲并識於此以俟異日補遺

馬食禾

君家馬不食粟食我苗告爾僕惟馬之腹惟民之肉二解
馬吏將髡我自不知進租當治長官知之馬吏怒且勿

答二解手挽銀鑼響縣卒來莽莽長跪馬吏乞言身是君
家廝養幸紓今日期明日賣兒納帑何以報君私束芻
斗麥日不遲為君養馬大如象三解

踏車曲

歷鹿歷鹿水入車腹不往則復一解海遠於岸中間轉灌

水上天半一半人汗二解長腰環環足繭車翻暮滿朝朝

三解龜坼蚜開艸死飛灰誰省災大吏回催租誰縣吏來

四解

周成婦

婦王氏適倫教周氏子周誤殺人遣成王自請從生

一子周亡負骸挈兒遶丐以養姑云

姑哭且勿死妾罪人婦當從夫征草枯芽生安知妾無

子解一仰視滄浪天故汝父遺有汝汝父家有姥姥不復

得汝父爲子幸老未死一十二年辛苦汝還姥撫汝即

汝父解二而子呱呱而骨模糊魂還來乎魂還來嗚嗚同

事吾姑解三

筮篋引

南海古稱龍戶吾近鄉龍潭有老獺者非獺也習水

善泅一日夜水底冲激逆流潛行八十里出水呼吸

僅三常漁於仰船岡岡在海中絕險惡當羚羊峽下

激流滙爲巨浸滅沒駭人岡下怪石吞吐波濤竅空

萬狀相傳石下有潭深莫測獺腰纏一舟三尺許入

舟輒貫長魚踴躍手提以出無虛返人間水石間撥

刺聲知獺自鮫宮鱗窟中來矣一日沒久不出上泛

小舟旋轉如飛海水微播人候之石罅浮沫如鼎沸

狀久之聲若雷吼一物隱起赫然老獺也頭陷惡魚

牙齧幾寸兩拳抉魚腮迸裂撐柱甚力俱死焉支解

魚售之遠市以葬獺猶有餘錢云胡子聞而悲之作

筮篋引

龍頷探珠虎穴攫子不顧而死解一貪實而口傷汝無狂

廣身文獻四集 卷之廿四 胡孝廉賜書樓詩 春暉堂選

長鯨隕首

二

收爾骨剡若肉山之足魚之腹

三

山石嵯

峨倒入江波日落風多當奈爾何

四

草書行贈潘景最

十五學草書不肯隨等輩把筆初祖梁與馮二生健筆
千人廢向予往往稱潘君閒來山房分清塵潘君靜者
好奇古神髓漸與古人親敗筆數斗墨數斛書法留筋
不留月興至含毫久經營意已飛動無羈束破打銀瓶
墨汁飛黃河倒注水九曲紙盡擲筆意有餘顧盼欲揮
千萬幅此時山房老樹排青冥中拏攫秋風爭鶴鶴
如鬼駭且嘯怪狀似助人縱橫坐中之客羣嘆息主人

起言腕下神助非人力風雨颯沓來天地無顏色唐懷
表後草法亡此意至今少所識當今海內推能書自恨
不及劉石夫生平強項見之屈流宕倔彊今時無我愛
主人筆有神又聞此言張吾軍省悟讀書與養氣氣盛
筆妙殊絕倫君不見白沙先生儒者宗圭山之茅化為

龍

屠牛行

海上夜半屠門開牛營燼徹牛牽來殼鯨解此盡殘喘
雨淚交迸雷鳴哀屠兒短衣身手好鐵踏驟掣邱山倒
十三女兒坐椅角四脚向空力虛擣尖刀微彎利不磨

隨手割入輕鴻毛須臾見刀不見血一聲吼絕崩懸河
割肉咄嗟付鼎鑊左顧牛主酒與酌計值呼令取萬錢
昨日背犁今肆嚼嗟爾鼓刀真忍人久食牛力戕牛身
飽橐不顧扞文網房氣寧體王心仁紛紛吏卒資貪
饕結交巨猾江湖多此輩豈肯坐餓死去此終奈椎埋
何

王以寧畫龍歌

王生淋漓潑墨誰人同拳塗瓜抹渾天工空壁突兀來
真龍之而滅沒有無中白氣上下旋成空海水倒立滄
溟東手掣匹練目眩久天漏驟恐精靈通神來之技技
至此道元僧繇今未死咫尺雷雨龍宮來王軸愁渡平
津水嗚呼乖龍割耳天神誅遇灾不向天門呼坐使七
牛湯旱桑林雩安得汝手鬼神俱九州五嶽留真圖出
匣雲氣須臾鋪跳梁魍鬼啼嗚嗚

送曾生入京

帝里吾生長南歸十五年送君今夜夢重得到幽燕雨
雲寒三月河山路八千白雲重回首去住兩茫然

真摯似杜

初晴

苦雨一旬中淋漓瀉半空芭蕉三十樹折盡五更風忽

聽鳴鳩亂旋驚曉日紅故人或相訪策杖過橋東

以古體入律勁氣直達一片神行海雪之後此爲嗣

音

送謝少文侍衛北上

地上看龍種軍中號虎臣行辭鈴閣靜到及貝城春子
舍知長戀天顏喜最親將星依斗望遙識近勾陳

飛雲頂聽天雞

天地開鴻濛天雞響碧空一聲出雲際萬籟生山中滄
海飛潮白扶桑湧日紅何人瞰暘谷傾耳石樓東

俠客

到處誦賢名相逢尙未驚氣雄翻短小折節竟儒生母
死千車會身留七國平舊游燕趙遍還上大梁城

太白樓

至今此樓上天地落空青自昔無同調舉杯余復停悠
悠漢陽水歷歷長庚星明日拂衣去長歌入渺冥

浴日亭

夜色赴高亭烏輪躍渺冥寒趨暘谷轉潮湧海門青元
氣回羣物神功動百靈賓賓識羲仲翹首帝堯庭

孫典籍

亂定知真主書成解阻兵功疑拜陸賈狂乃死彌衡文

字寧奇禍君王尚聖明如何鼙鼓後始得見平生

陳思王

始信才爲累寧非骨肉親積嫌詞賦美多誤性情真感
悟憐其豆幽思托洛神十千沽酒至獨弔建安人

不寐

不寐常終夜身孤百感交計惟娛老母居暫庇重茅支
病明辭藥憂危隱覆巢但從風雨後白髮上青綃

對奕

夜深深院一聲聲敲落燈花氣未平我眼已寬閒處急
君心誰料死中生如留劫局終難了打算通盤始是贏

底事不妨饒一着何須黑白太分明

是閱歷人語

班婕妤

漢葉將微禍水侵婕妤辭輦意何深竟成一代名臣疏
豈特千秋列女箴長信夜寒統素扇昭陽春暖鳳凰琴
相思不見張公子終抱披香博士心

硯

割自羚羊紫玉堆昭王臺返越王臺兒時記得頻呵凍
夜侍先臣草諫來

聞任郎歌呈其詹

紅牙拍急蠟燈微舊曲聽來泪滿衣莫怪周郎全不顧
爲他偏唱雁孤飛

謝又文教余騎馬上遽呈

花驄八尺聳連錢金埒初盤紫玉鞭莫笑書生曾膽怯
欲從戎到夜郎天

席中呈謝廉菴參戎

酒酣日落動檀槽坐上將軍北調高入破一聲纔出塞
西行賓客看霜刀

寧江竹枝詞

夜郎江水走羚羊萬斛舟行激箭忙今日遠遊卽且住

風波愁殺仰船岡

其二

木頭海角掉波回馬鼻山尖亂石堆瞥見泊鄒厓上字
舊時真有謫仙來

廣東文獻四集卷之廿五分目

陳茂才石緣詩鈔

序畧

附論

詩目

送潘華蒼三首 五古

題畫菊 以下七古

舟泊沙冲

張太傅墓

老尼歌

廣東文獻四集
卷之廿五
分目
二
春暉堂集

貢象行

石佛 以下五律

送屈如楚

酒

附詩

冬村

王中丞廟 以下七律

秋興四首

送梁夫子公車北上

送梁夫子還朝

羊城早春

鐵城望海

海市 以下五絕

蜃樓

題射潮圖

聽人鼓瑟

題牡丹詩

題子長像

友人過訪

澳門竹枝詞四首

竹

廣東文獻四集

卷之廿五

陳茂才石緣詩鈔

序畧

皖城張明府必剛序曰乾隆辛未余宰潮陽學使鳳谷程公考棚事暇語余曰君深詩律余於廣郡得一士陳官者蓋今之古人也吾已拔冠一軍矣因出其感遇諸什以相賞越五載雲舒劉公亦以按試來臨論及廣州人物謂得香山陳生因誦其五更自警歌嘆為奇作迨已卯呈誤歸得其全集於潛山官舍受而卒讀之然後

廣東文獻四集

卷之廿五

陳茂才石緣詩鈔

一

春軍堂選

知二公之鑒賞非虛也

按先生名官字子洪香山小黃圃人諸生僑寓鳳城
掩關城南金山與同人唱和著有石綠詩鈔書雖晚
出劇多可傳之作

石綠詩選

送潘華蒼之杭州兼呈萬松梁夫子

諱景璋順德人乙丑進士

參商有離星琴瑟有離聲秋風飄白社有客之杭城八
月潮頭高涉險心貴平白首行路難非復少年程新詩
橐中滿寶劍匣中鳴桂影射寒光黃花葆其英君子崇
令聞故園無限情

其二

憶君宦太倉披星駕風駛紅粟運千艘一官聾雙耳歸
來老而豪詞壇開壁壘醉憶六橋花夢癢射潮技忽動
人心遙跨錦江鯉清風吹鬢絲西湖望西子應和白傳

吟杭州好山水

其三

餘杭有仙吏昔爲五經師宦海去十年鷓鴣棲一枝鴻
音來萬里勗戒如父慈豈不憶韓門青衫泪盈滋高堂
有垂白遂負山水期遙情托君旃爲致西湖湄

題潘華蒼畫菊

誰人心是楚臣心裡心清飮落英千千畝又誰身是淵
明身後身目空三尺酒一斗白帝申申怒告予云是鏡
岳有潘某鬼操其斧神運工一秋造化奪在手有時憤
寫胸中不平念枝枝槎枒橫利劍有時咀英復吐華秀

似河陽縣裡花有時秋風許白戰會憶標名黃金殿有
時擲筆發長嘯傲骨稜稜蟠石竅忽而淋漓鬱勃傷遲
暮摧折飄搖半開吐忽而疎枝大葉蒼且老大似鏡岳
山房稿畫中詩菊中譜五花八門蘊靈府香國平章欲
擅權不畏嚴霜及怒雨我道秋附聾龕秋不死帝得秋
答彼得髓一枝可作千萬枝大地山河秋色裏稽首帝
前帝曰都命汝作東籬花史

唐人題畫至工部極矣此作跳脫玲瓏變幻無端寔
得其神妙

夏日舟泊沙衝訪宋行宮故址有懷馬侍郎

宋行宮在香邑沙衝鄉卽馬侍郎宅侍郎諱南寶景
爰二年丞相陳宜中太傅張世傑等奉端宗自潮州
之淺灣到邑侍郎宅中荔子方熟遂進御焉并獻二
千石供軍帝卽暫宮於侍郎家侍郎竭方保衛與世
傑等募兵興復旣而世傑兵敗奉帝次碭州帝崩世
傑立衛王昺走厓山侍郎病未及從宋亡不食賦詩
志痛後被執不屈死

按此與鄉賢異附錄於後

按廣州鄉賢傳端宗崩殯於馬南寶家宋亡不食
元人籍仕宋者南寶不以姓名降賦詩云翔龍宮
闕已蓬飄此日傷心萬國朝目擊厓門天地改寸

心難與夜潮消又日黃屋匡扶事已非遺黎空自
泪沾衣衆星耿耿滄溟底恨不同歸一少微已而
元兵欲屠潮居里人皆爲南寶危南寶不爲動後
莫知所亡相傳端宗臨幸時荔子方熟帝摘一枝
其後經摘處風味獨殊人以爲異云

沙冲兩岸荔如雲沙涌兩岸人成羣遊人來往日不歇
清歌擘荔何紛紛我來沙冲偶避暑維丹荔樹獨不語
憶昔當年馬侍郎一聲太息奈何許南宋行宮安在哉
白鷗歲歲尙飛來靈均久抱泪羅志巡遠真成絕食哀
憶昔端皇南渡時六軍供具若難支圖邊豈望漢卜式

再造空思孰子儀侍郎致粟還開宴荔枝捧出邀天眷
草堂風雨本蕭條一朝權作南薰殿恨殺秋風白雁橫
痛飲黃龍在此行長歌忠武長驅句眼光迸裂摧心肝
此時忠勇誰同志太傅九死力不躡香山島上戰雲紅
舳艫血並波濤漬大事可爲不可爲慷當以慨是男兒
丞相雄圖不令終陳宜中
走占城太傅丹心自鞠躬羊城克復
雖暫喜一夜鼎湖遊帝子礪州盡種白柰花沙冲荔樹
響悲笳衛王擁立厓山去孤臣寧敢忘奔赴龍髯板斷
痛先皇沉疴未起卧繩床夢中未嘗忘恢復恨不君臣
塋魚腹魚腹塋張與陸柴市亡文天祥先死後死日

月光陵谷變遷夫何常元家官殿久坵荒吾鄉乃有文
天祥嗚呼吾鄉乃有文天祥

謁張太傅墓

十年前讀厓山志中夜唏噓兼涕淚北風刺刺打窗寒
心中倏有不平事幾時萍踪到厓山三忠堂上認忠顏
蒼茫獨立高山仰咫尺精神對越間香山厓山隔一島
湖居里內恣幽討忠魂一縷眼前來因悟張公此墓道
張公在昔抗孤忠左右文公與陸公間關百戰來窮海
一夜孤舟畢大風大風起兮公所祝此身拚塋長鯨腹
長鯨磨牙日噬人獨見公尸神惛服白龍鼓浪擁公行

波中躍出面如生三軍號哭天晝晦楚些斷續誰堪聞
 入水不濡火不熱公之精誠百煉鐵此時乾坤正灰劫
 公之鐵胆劫不滅函骨荒村志未酬誓為厲鬼報國仇
 上天得請臣恢復靈旂金甲走雲頭公薨翌日諸軍焚
 尸島上胆大如斗
 雲中見金甲神云太土以我馳驅關係不小已多方措
 置恢復由是軍心不移陸丞相挽之有曾聞海上鉄斗
 胆猶見雲中金甲神之句不信皇天亦食言兩厓波浪通天昏玉璽
 光堙沉塊肉春山花落弔慈元只今父老空唧唧古墓
 年年趁寒食一坏土一殘碣是狐官是馬鬣千秋日月
 此昭揭射雕之人亦咋舌

松筠菴老尼歌

出牆短罄聲清好一角精籃引幽討茫茫今昔悟悲歡
 月不長圓花易老中有老尼坐蒲團白髮婆婆殊可憐
 問以法名及年歲側着雙耳聽不全旁有一尼代啟齒
 與儂俱過古稀矣約畧披緇五十秋俗家河南舊姓李
 詞氣渾似帶悽愴癡娥雙合蓮華掌貌同殘月映殘梨
 欲說不說如有想長歎一聲泪痕繞始云不說君不曉
 予本西府舊紅粧粉黛叢中薄蘇小將軍沈勇猛如虎
沈公官 手握帥印鳴金鼓闕擁金釵十二行猶嗜笙歌
順德鎮 尋樂部兒時執板剛登場將軍賜我雞舌香二人竟致
 魚貫寵金粉雲鬟歌鳳凰誰料西鄰調錦瑟工狐媚者

鷹鷄七勾欄一入主魂消專房寵合羣屈膝轉盼榮落
能幾時歌殘秋扇妬娥眉喜呼捧饌供厨役怒握銀鉗
碎玉肌將軍殺人如剖瓜牝雞應得索其家忠言直諫
湯參佐生烹俠骨沉寒沙多行不義必自斃冰山倚處
終無濟願言祝髮識將軍將軍許出清涼出法輪一轉
離苦獄松筠菴裏持金粟初來暫解小乘經久後漸忘
吳紵曲未幾楊子九閭顛 天家裁鎮都門縛梁冀誅
夷孫壽亡始信禍福人自作於今轉眼五十秋塵緣塵
網空悠悠楊柳一枝蓮九品青天明月橫江流我聞此
言深歎息物理盛衰豈有極百年紅粉卽骷髏將軍士
墓多荆棘古今傀儡一登場鼓收板歇空悲傷

貢象行

聖明御世世風古麟來遊兮鳳來舞俺答長生白狻猊
兩淮時見渡河虎忽聞海國交趾王身騎白象來五羊
搏取奇獸獻 天子大書入貢安南航金鈎瓔絡鬼奴
控翻海排山毛鬣光鼻捲蠻烟蔽天日耳扇和風開八
荒象兮聞汝披堅與執銳汝云足以壯將帥聞汝抱齒
然其身汝云足以儆貪吏聞汝百折不回頭汝云足以
勵臣志聞汝努目不事仇汝云足以觴邪媚象本龐然
一物耳只任虛生不虛死駿骨寧許投明時燕臺那用

千金市越裳雉肅慎矢必有聖人當日起試問黎家與
莫家海不揚波三年矣

石佛

欲拜元非丈曇花罩影孤三生真色相四大任跣跣道
以頑中得禪從冷處枯不知逢說法還自點頭無

送屈如楚作客匡州

識君貧賤日岐路重逡巡白首行千里青山剩一身蠱
飛蠶有鬼楓老樹生人莫更窮坵壑天南盡九真

咏酒

是鄉殊未遠春雨秋風期死便當埋我生猶復中之無

官能主政有債不闕詩剛得吟魂暖前村又掛旂

附拙作

麴生吾愛汝妙術返童顏獨酌三觥後寄情千仞間
乾坤何濇次跼踖且高閑天壤多勝事携汝共躋扳

冬村

邇來村事好佳氣滿柴扉鹵淺蟬蝦軟烟深白蜺肥打
禾田父去檢葉小童歸夜靜聞刀剪山妻縫絮衣

王大中丞廟

中丞諱來任盛京人康熙甲辰盧御史奏請徙邊廣
屬番新東順香五縣沿海之民流離失所中丞至安

履東文獻四集 卷之五 春明堂遺
輯之未幾卒於官遺疏極言其狀已酉始得復界民
德之立祠以祀

中丞合把黃金鑄入廟哀歌感有餘父老泣言兵燹後
江山安似未遷初魂排 天闕飛丹疏神逐靈風走電
車民社自膺人不少可曾細讀展疆書

秋興

桂香榕子散山阿匣劍帷燈伴放歌七八月秋寒氣淺
百千年史亂時多賣文半爲商聲減得句長教月下哦
性癖渾忘秋氣蕭翻將風月養天和

其二

隱居原是樂天時敢付塵寰瞽與癡蛛網共除方是盡
好花孤賞便爲私月如姣女窺粧早菊似徵君應聘遲
入眼便資吟興發閒中還補白華詩

其三

霜竚猿鳴惹恨天中庭骨肉且團圓兒癡累婦醒長夜
親老憂家勝壯年擊柝且難求祿仕傳經多愧守文壇
竹孫蘭笋重重美滿注長春酒一筵

其四

蕭蕭落木氣森森庾亮登樓謝眺吟醉枕南華千古夢
悲調塞曲萬家砧山形未老人長老雲竇無心鶴有心

極目清光同一色平分哀樂問升沉

送尚南梁夫子公車北上

家貧親老我留慚不向天涯服御驂
擊鉢客行燕市北關心人倚越臺南
清時好獻天人策絳帳空懸麈尾譚
若付征鴻問生計西風黃葉一茅菴

送尚南梁天子還朝

夫子時爲民部主政

秋星霜月逐巾車拜袞啣恩度玉除
三戶待陳河水議四方期上耗登書
吟壇客去征鞍遠立雪堂虛問字疎
不負司農門下士年年徭役事耕鋤

羊城早春

五羊化石號仙靈春色潛回氣尙清
訶子葉開虞氏苑日南花發趙佗城
元燈剪綵兒童戲辛酒屠蘇客子情
最是二禺堪賞玩黃柑携去聽流鶯

鐵城望海

香山別號鐵城

凍雲深鎖舊柴扉江柳絲絲漸作圍
香滿市頭椰子熟腥回天外鬣帆歸
零丁洋湧孤臣淚正氣歌殘宋祚微
今古茫茫無限恨登臨遙睇思依依

海市

鬧市日紛紛輕帆望海濱逐利往來客此中人笑人

廬樓

可望不可卽飛空海氣蒸樓臺何處所漢苑與秦陵

題錢武肅射潮圖

霸氣起東南偏安海氣涵可憐射潮弩不肯向朱三

錢氏值中原雲擾五十年間歷五代八姓十一主欲
稱兵討賊則亦不勝其煩矣修事大之禮保境安民
自治其國亦勢所必然也責以討朱三義雖嚴正而
事勢不堪合宜

聽人鼓瑟

輕撫漫撥譜雲和渺矣湘靈奈若何木葉無聲滿天地

西風吹入洞庭波

題黎美周先生牡丹詩後

金粉文章大有神牡丹占得狀元春勤王檄草西江骨
誰道留侯是婦人

題李子長先生自畫小影

抱得天真樂可尋風光澹蕩墨雲深遙將有象徵無象
想見先生太古心

友人遇訪金山遺以詩作此奉答

有客山菴書錦文值予出訪洞庭君歸來檢點床頭篋

竊去松風與白雲

澳門竹枝詞

澳門在香港前山砦北枕青湘南望十字門波濤瀾
泝鯨魚出沒最爲壯觀明嘉靖中西洋商船遭風濕
漬貢物願借晒晾歲輸地租五百金廷議許之我
朝因焉迄今三百餘年生齒日繁矣

澳門東接大洋邊十字門開天外天澳頭一直蓮莖路
儂是中間朶蓮

其二

澳門禮數異中華不拜天尊與釋迦濠湧鏡光樓六角

山飛磴道寺三巴

其三

生男莫喜女莫悲女子持家二八時昨暮剛傳洋船到
今朝門戶滿唐兒

其四

戒指拈來雜異香同心結就兩鴛鴦嫁郎未必他年悔
生子還當付法王

竹

斑龍彩鳳總難分一日不能離此君湘水滿簾扶不起
綠卿披盡墨池雲

廣東文獻四集卷之廿六分目

潘從君深柳集

序略

墓誌

詩目

舟中夜望羅浮

雨後泊舟苦竹派

起程

天宇嶂

自清溪至白鹽墩是日約行二十里

道中雜詩 六首

春曉出郭

春夜憶梁我軒司農

咏山荔枝 二首

夏日雜詠 五首

羅浮小鳥

寄懷胡任齊將軍

日夕

秋夜獨酌

晚望

朝雲墓

白雲庵卽事

寄胡東泉

迎春

記夢

曉起

對月寄家叔藩政

山花

艸色

虫聲

旅中夜坐

讀罷

新晴

登樓

春歸

初夏竒懷巖五峯而大

鐵樹花

題阮青城都尉桐下披書圖

二首

秋沙答黎二樵贈用韻

茶花

二十

咏史

二首

春雲

大忠祠懷古

二首

水仙花

小除日偕胡葵圃胡東泉趙獨醒同咏爆竹

黃羊祀灶祠

二首

榆錢

松針

荷蓋

柳線

廣東文獻四集

卷之七十六

分目

三

春時堂選

長信秋詞

寶劍篇

遊仙詩 二首

苦雨

廣東文獻四集

卷之廿六

潘徵君深柳集

序略

蓋聞人言之不足故長言之長言之不足故嗟歎之嗟
 嘆之不足故詠歌之自古詞人學士發秀含芳摘華採
 藻者有自來矣余宗伯仰松公桂洲鄉人也環鷺渚之
 清流挹獅峰之疊巘山川清淑之氣秀毓靈鍾故其詞
 翰之鬱肆於筆端者猷出冠時而得與古之詞人學士
 後先輝映也歲甲寅公以西席延余於華蓋山房中余

重其請遂館於其家公使其長孫士昌輩束髮受書焉
已而晨夕晤對樽酒論文驟有所得卽舉以見示其於
近體古體諸詩各極精妙而於古體更屬奇警可愛有
時吟興鬱勃長嘯高歌則傾囊倒篋如蜃樓如海市如
鬱浪怒春如奔飈颯起恠恠奇奇莫可名狀所謂語不
驚人死不休者吾於公而迺信耳其或江山如繪風雨
稱臣抑揚造化之奇刻劃虛無之妙冀有當於登高之
旨以爲異日館閣之資者莫不聲諧金石韻叶宮商蓋
又將以炳炳麟麟者和其聲以鳴 國家之盛也至其
胸羅全史眼光如炬上下數千年瞭若指掌所著史論

數十則其興亡治亂之機是非得失之介則又識高五
嶽筆挾秋霜每一論出字字居要比之鍊璧銅墻不可
移動此更非經生所能窺其萬一也余課讀暇紬繹焉
因思古之稱三不朽者太上立德次立功次立言言之
有物皆足以垂世而立教故當酒闌燭跋曉風殘月之
時與其長孫士昌輩勸公剗剗以昭永久公猶瞿然以
爲災梨未敢遽自信也庚申歲冬余以公車北上而公
之年亦已九十有七矣爾時桂茁瑤塔蘭抽釵砌公廼
務分甘於旦夕思點頷於孫曾家庭之樂行路侈爲美
談而公之於筆研亦少疎矣余正恐其散佚而無傳公

廣東文獻四集 卷之廿六
始逸其半而存其半遂得編成卷帙付之梓氏以少慰
余意焉嘉慶五年九月下泮宗姪潘善長謹書於惜陰
別墅

按先生名文因號仰松順德桂洲鄉人封州司馬生
平好讀書識大義不求聞達縱酒聯吟若將終身著
有深柳閒草夷猶澹宕不爲巉刻蘄絕之言卒年九
十有七

深柳集詩選

舟中夜望羅浮

嶺海名山首仙靈窟宅幽每從天際望久已夢中遊風
月來清夜峯巒落小舟依然身不到丹藥想難求

雨後泊舟苦竹派

雨氣歇復作舍舟將山行濕雲流林薄野水奔溝阮鳥
既滑滑啼蛙亦閣閣鳴念此衆景象豈不愁遠征薄言
沽村酒舉杯聊自傾且試待來朝未必不晴明

起程

見說崎嶇道不平連雲峻嶺勢崢嶸此行未必無佳趣

一路看山到縣城
要求絕勝愜予懷
晴霽宜行雨亦佳
寄語山靈須識我
黛眉螺髻好安排

天字嶂

一山直而方一山曲而長一山瘦且削一山起且僵一
山兼衆有形狀迥異常連雲崢嶸甚拔地氣勢強將開
乃復闔仁低却忽昂森列獅象蹲屹立屏風張是爲天
字嶂高高誰測量我來二月初連雨日無光含霧橫籠
面迴風倒吹裳危磴溜脚濕翠落眸涼行行欲復止恨
非駐足場勞瘁憫僕夫勉度此崇岡勢奈環匝遙看
成堵牆前後似不通蟻旋沿兩旁又類蟬居繭包我在
中央參錯出寒林蕭瑟響幽篁疑有魑魅嘯或多虎豹
藏未免豎毛髮誰云足倘佯望望殊未了惴惴恐見傷
搔首三太息何如遠吾鄉

自清溪至白鹽墩是日約行二十餘里

晨發清溪鄉雨勢竟不絕數里輒一停溪流激漂激所
涉大溪三小溪不勝說每遇大溪橫僕夫衣盡禿往來
測淺深徑過未敢決最後到一溪洶湧波起凸聲撼狂
飈捲湍迅飛電掣瀾迴翻雨絲渦漩齧石鼈是時吹煙
動黯淡日將昝昨霄聞有虎猛嘯高岡裂驚心膽欲墮

袖手步履驚憐我小孫子嬉戲登旁坵未識我憂煎挽
鬚要提挈遲之又久之奔洪乃稍洩僕夫邀重賞奮勇
矢力竭許許昇肩輿半渡防蹉跌自鹽遙在望村燈在
明滅懸崖破茅店欹斜倚山缺濁醪慰我愁聊用散鬱
結顧借尔役人涔涔脚流血

道中雜詩

六首

我行惠陽道亂山連不了低者落山罅高者凌樹抄草
際蚊蚋飛人雲霧繞陟降崎嶇間一聲鷓鴣鳥
居民少商賈業農乃其本所以無曠土稍平卽開墾田
隘罕盈尺雨滑步不穩一跌或丈尋凜凜此往返

記里百二十要分三日程遇田卽無路詩曲緣田塍往

往週時間絕不見人行嗟爾迷途者何以達山城

擔柴遠村女假髻露半尺不肯戴山花黑帕潤包額冉
冉過溪深隱隱入林碧水跡一帶長落暉摧行客

茅檐氣浮浮山村共蒸穀貯以甕連蓋磨用土填竹未
必求悅口但當期果腹少陵思滑匙到此應隨俗

山多大且高野味應登膳鷄雉乃稍有麋麇絕未見良
由多藝殖禽獸難藏居問爾山中民欸客鷄豚歟

春曉出郭

山光四面染青螺似欲相迎活態多乘興恰當春服好

快人偏又惠風和並頭花放紅含露啣尾魚遊綠上波
都是觸機動處不妨隨意且高歌

春夜憶梁莪軒司農

交情老矣倍思量何況分攜隔遠方兩地夢魂春又去
一燈風雨夜偏長難忘別墅吟兼飲更愛雄談慨以慷
行樂遙知向花底飛飛燕子柳垂塘

咏山荔枝 二首

渴想瓊漿已一年山中摘出口流涎兒童怕手爭採取
試映紅鞋色更鮮

猩袍也自裹瓊膚酸味偏多類腐儒要學東坡二百顆

攢眉應笑不如無

夏日雜咏 五首

長松脩竹綠槐邊一部新聲嘒嘒蟬風淡雨餘人更適
公然半日做神仙

維摩一卷並南華半雜儒家半釋家問字門生如載酒
好我畀我看烟霞

煮茶松下沸雲漿氣頗清芬性本涼自笑官非居七品
畧諳風味敢多嘗 金史七品官始許飲茶

閒憑鳥几近窓紗午夢初醒日漸斜一陣清風生兩腋
松濤洶湧竹交加

日長無計避炎蒸赤脚何方去踏水好是晚風疎雨過
家僮來報日初升

羅浮小鳥

羅浮夏秋天林花尚繁盛有鳥如小燕花間鳴相應非
絲亦非竹非鐘亦非磬乍大而乍小似答復似贈豈其
桐花鳳時非際春令豈其搗葯禽叮噓聲未正別自成
音曲居然一部勝綠槐叢篁邊悠揚滿清聽緬想幽棲
人瞑目方八定母乃雜宮商耳根反不淨誰知道氣純
煩囂都繕性流水行雲中一樣心無競吾將撰杖屨孤
往聊乘興借取聲聞果深求微妙證願領第一義同爾

坐松徑亦學禽對話唱和發高詠

寄懷胡任齋將軍

蕭然抱膝坐寒齋幾度臨風想雅懷詩句定應新舊
秋光又是老吾儕入山我似逃鄉國對月君宜擁麗佳
見說暮春富北上何時同醉酒如淮

日夕

青齋客去久暝坐聞啼禽地僻人能靜山高日易沈村
烟經雨重林竹過風深亦有悠然趣閒情發短吟

秋夜獨酌

微雲送雨晚天新獨酌悠然適性真半榻琴書供醉眼

一林蟋蟀伴吟身竹生入座秋生袂花影搖窓月近人
似此山齋足歡喜不嫌岑寂兩相親

晚望

入目平林亂晚鴉炊烟處處起人家魚書極目雙眸眊
鄉思愁生兩鬢華落日帶雲歸遠岫斜風送雨濕幽花
故園松菊應思我佇立無言對水涯

贈羅浮隱者

一瓶一鉢寄蝸廬塵榻蕭然讀道書留客每沽茅店
佐餐時釣碧潭魚悠揚笛韻秋雲外縹緲詩情晚照
相對便教思俗氣名山採藥好攜子

朝雲墓

一杯黃土萬緣空草自青青花自紅小袖雲藍求鬢
湖光山色有無中

多少遊人悵落暝也緣坡老弔孤墳誰知天女維
偶看香花結習身

白雲庵卽事

門掩蔽青山山雲落棟閒厨荒烟寂寂簾破雨潺潺有
竹僧堪侶無經佛亦閒平生慣幽討瞑坐不知還

寄胡東泉

少年角藝逐文壇相對時時論膽肝坐月定須留夜半

行吟曾不避風寒功名潦倒人還健氣骨嶙峋節未剛
壽屆古稀誰與祝弄孫好自努加餐

謝胡葵圃惠新茶

胡生惠我兩前茶氣味幽香沁齒牙似遣此公來洗俗

不知骨格本烟霞

予體甚輕

養生吾意要扶藪學道安心願守雌笑爾尚非真解事
如何不割老君眉

又餉佛手柑

斷取金生丈六長瓊羅錦手落清香
勝乞新橙一樹黃

迎春

迎春今日在深山春爲山高似早還照水桃初開朶朶
穿林鳥乍語關關吏人捧榼三斟酒官馬遊城兩嚼環
此景此情堪一笑臨風顧盼也怡顏

紀夢

牛之年虎之月日躔輒訾先五日水輪夜湧色澄澈星
文燦爛作作芒清景娛人自怡悅一枝花影橫窓低三
杯軟飽書帷歇夢從宮牆繞砌行紆盡處蟲窺闕宏廠
深邃與世殊棟桴高驤聳堯辟闔其無人四悄然顯氣
清英匝遼瀾俯仰逶迤層遞進直北坦衢修且潔明知

神聖居莊嚴整飭衣冠奚敢褻立望罽門洞開氣象
昌華思上謁情態猶豫尙狐疑猛聞震厲大聲喝匍匐
在地乍戰兢心魂漾殊怖懼三步一跪叩頭深微軀寸
意矢誠竭是儀豈有人贊道此際獨顧身孤子天風吹
鐸韻琅琅雲英佈綵光奕奕所見景物皆空明斗爾胸
懷頓起豁斯須始得氣息和布武徐行防顛蹶東廡西
序對瑤階左臧右平臨藻稅周遭玉磧朱楹栖舒長檀
几中央設夾案文吏四五人縹帙萬種森羅列一吏持
物指謂子是乃名爲集古鉢製自廬陵歐陽公價非尋
常輕莫說子審此鉢黑侔漆徑約四寸幽光發形類無

柄小傘仰可開可閣體裁別內有金書集古字半隱半
現藏摺疊縹緲古香遠撲鼻閃爍精氣頗凌曉意雖愛
好錢却少旁無借貸念亦輟卽此小鉢已貴重而况異
書敢繙閱交還吏手他方遊循廊以趨多曲折芴椽布
翼光爛朗鏤檻文欂互續接歷歷連樓板上過足不履
地纖埃絕但覺五色浮渥彩清塵影影壁繪雪頗訝十
餘處皆同回惑不釋意兀兀安心目自覓歸計擬求出
路那由達欲尋人問何處尋傍徨四顧徒躑躅徘徊人
之忽驚悟細想此夢真奇闕凝神脉脉再追尋爐畔殘
燈半明滅

曉起
窓紙微明漏曉光欲尋殘夢坐匡床鳥聲和悅邀人起
一架薔縷滿院香

對月寄家叔藩政

竹林坐久露沾人忽憶吾家大阮真憐我悼亡能館我
食貧好客不言貧疎星點水迢迢夜皎月流雲寂寂春
料對清光還見憶彼來此往夢應頻

山花

好雨沾濡後野花開滿山種雖多瑣碎色亦自爛斑靜
極香纔覺吟餘意共閒無人知賞識盡日翠微間

草色

忽然青滿日纔是雨初晴早爲幽人賞偏當曲徑橫浮
光神獨遠染黛態頻生不盡欣欣意都含大造情

春雨寄寄堂上人

禪關揜處草青青細雨瀟疎正好聽偶爾微吟知悅性
蕭然獨坐自忘形茶烟繚繞浮窓竹花影迷離落藏經
靜對沾濡如見憶不妨飛錫訪山扃

蟲蝨聲

唧唧因何事真成徹夜明妒人魂夢穩聒耳怨嗟生豈
料閒居趨翻多咏物情妙哉曹相國歌應後園聲

旅中夜坐

離家今已久兩地望應同想像鄉園處清幽夜色中露
葉明山月鳴蟲襍竹風宵分誰與語天外有歸鴻

讀罷

讀書罷無事觸景意欣欣好酒宜微醉竒香要自焚窓
陰雲過樹林噪鳥歸羣幽興知何限高吟日又曛

新晴

翛然扶杖立山坡雨氣猶存景物和烟靄四闌青欲滴
僕人眉宇落衣多

登樓

登樓舒望眼迢遞見林垌烟雨霑衣碧松篁匝地青窓
虛山亂入溪遠水疑停不盡撩人處渾教活性靈

春歸二首

林花猶自滿芳霏說是春歸想未歸記得迎來正月首
桃紅鳥語尙依稀

山高已覺春來早料得山深去亦遲且自從容忙底事
慰人遠待隔年期

初夏寄懷嚴五峯而大

花事闌珊又一年恨無江水送歸船招邀勝會尋誰共
想像高懷只夢牽賭酒圍碁留客夜和風細雨賦詩天

知君對景遙相憶念我層巒疊嶂邊

題蘇紫庭羅浮百咏

新詩勝地兩嶙峋一樣靈竒絕有神字韻二千峰四百
吟餘我似八山人

鐵樹花 二首

此花氣骨有剛風蜂蝶難親想避鋒兩大呈能司橐籥
六丁奏巧費銷鎔花開必於丁卯插冠好映寒霜面賜券宜鑿
大樹封倘遇道人吹鐵篴一生試問幾相逢

紫光耀日現存身一到花期更有神不易出時方刮目
最難逢處且驚人鑄成巧借陰陽炭煉骨何勞煩惱薪

六十年開豈遲暮大椿猶待八千春

蘇紫庭以遊狀元峯詩見示并索和即用其韻

帶回山色幸相分滿紙空濛尙繞雲但覺詩中俱有畫
居然一幅李將軍

狀元峯頂勢崔巍扳葛捫蘿首漫回不見前朝曹典史
錦標奪得狀元來

因也時時欲探幽登山不喜喜乘舟一呼一吸通天倚
甘讓吾公占上頭

題阮青城都尉桐下披書圖 二首

一卷竒書八尺身山泉竹石共精神胸中大有龍韜在

未必區區泥古人

英英神氣動髭鬚拂面涼風透碧梧他日清霜凝畫戟
輕投緩帶更投壺

秋杪荅黎二樵見贈用韻

嗜古情雖闊無才語亦常祇應求自悅未覺有微長
露白思秋沍霞紅問夕陽所期君助我鴉韻寫中藏

初冬偕胡東泉趙獨醒集香巖精舍

小陽春近欲催梅况又東籬菊盡開忽訝王香凝畫檻
瞥逢丹穎出蒼苔風搖別畹枝仍秀霜被寒臯客正來
想與芝蘭人契合故留清韻伴高才

霜後望官山嶂諸峯

官山高出萬山羣處處凝霜望裡分一色微茫浮淺白
四圍蒼翠湧清氛寒生岩樹竒遙贈冷徹皋禽響聞聞
我欲策筇尋好景丹楓夾路入層雲

羅浮靈壽藤杖

白玉蟾兮定葛翁是誰留得此仙筇住山久作神靈用
八世長將老壽供步步引人歸勝地年年隨我探芳踪
從今藉爾扶持便飽歷朱明四百峯

菜花

亦有繁華日依然淡泊身慣爲貧士賞夙共老僧親寂

寂霜厨晚蕭蕭野圃春得時原可貴靜對咬根人

其二

斜日臨寒澗誰人肯買春何妨自怡悅亦別有精神色冷
難娛俗香微不過隣霜花開滿處恬淡是天真

咏史二首

好鶴軒前戰士林鬪鷄坊裡小兒稠當時只少徐無鬼
狗馬猶能感武侯
卯兮城外海雲低童女童男路渺迷縱有神仙生死樂
可曾乞得一圭刀

遊海幢禪院咏菜菔

幾點間間黃色瘦滿畦漠漠野風翻懶飛凍蝶如無意
暗滴晨霜尙漬痕冷淡久爲禪客侶清寒不入衆芳門
料應我佛拈來笑知有儒生此咬根

春雲

春雲真可愛舒卷對春人冉冉陽和滿飄飄態度新從
龍多變化捧日起輪囷會得詩家趣長空嫵娜頻

大忠祠懷古

丞相祠堂發遠情千秋憑弔感忠貞竹林尙照屯軍影
南嶺有竹文山取以照軍
後人因名爲丞相竹
山鳥如歌正氣聲想像艱難
偕將士羞慚逃遁有公卿瓣香再拜揮毫處欲借當年

玉帶生

文山研名

嶺海間關切枕戈主憂主辱痛如何題詞素志同雙廟
有題張巡許遠雙忠廟詞一闕轉戰丹誠貫五坡但使孤臣心孔孟依
然寸土舊山河卽今祠宇雖千古松栢南枝恨尙多

水仙花

嶙然波面立誰得賞茲花最好風兼月偏宜石與沙清
華香作國雅潔水爲家似解湘靈曲芳顏聽欲斜

又

水石清幽境香風澹沲過芳心宜貯月雅態欲凌波渺
渺予懷遠盈盈爾韻多試彈水仙操相對意如何

小除日偕胡葵圃胡東泉趙獨醒同訪爆竹

冥濛細雨立春初爆竹聲中入小除處處共聞連谷响
人人都喜不祥祛轟然烟焰雷霆震譁爾兒童不語舒
獨有撚鬚苦吟客破他催速莫徐徐

黃羊祀灶詞

二首

食貧歲歲守林垌祀灶今朝望眼青何惜黃羊將進酒
不知果否有神靈
從來富極可通神更有黃羊不患貧莫遣富家知此詠
恐教繼富愈驕人

水仙花

託根喜幽靜寄趣渺波濤窈窕臨湘浦娉好出漢皋芳
姿金玉上逸致水雲高獨立凌虛際清冷想潔操

榆錢

搖錢有樹蔭茅檐每夜因風歷亂添枉自東皇頻見贈
不知高士久能廉園花欲買春千頃村酒難沽雨滿巾
漫笑阮囊羞澁處任堆牆角好教嫌

松針

五鬣織長萬疊鋪銛鋒欲刺碧雲映鐵疴誰擬延蒼叟
補衮人須讓大夫天矯穿成棲鶴荏騰擎綉出老龍圖
女蘿月下垂垂夜得與靈芸鬪巧無

荷蓋

勝日尋芳景自佳田田採得愜中懷擎來綠沁青羅帶
覆處香沾碧玉釵雨瀉全遮窺沼鶴風翻半露蕩舟娃
若逢茂叔應傾蓋杖屨隨吟水一涯

柳線

綠散千條弄曉暉春風搖漾拂庭闈恍疑慈母手中線
欲綴遊人身上衣幾度雨絲交嬾娜不勝烟縷對菲微
客邊感觸牽情甚夢敝應思早得歸

長信秋詞

絢扇秋深尙自持南薰屢奉好風吹承恩已久應辭寵

添花補竹又焚香

芒雨

商羊跳未

次躍不休金烏濡朱羽玉兔掩明眸正

晝如黃昏酷暑疑清秋松竹無停滴陂塘惟亂流將告

新禱乏仍未稻梁收前者雨幸禱五月初二求雨兩日而應今茲

須求苦哉我人斯旱潦皆懷憂天屮誰楊揮雲根悉挾

搜丹霞萬縷引彩虹雙道浮請迴雨師駕七月迓靈麻



